
Title	Ketinggian budi
Author(s)	Muhammad Ariff bin Ahmad

Copyright © 1948 Muhammad Ariff bin Ahmad

CENDERAMATA SITC.
JULY 1948

KETINGGIAN BUDI

oleh: Muhammad Ariff Ahmad (Singapura)

Perkataan gambaran hati,
kelakuan lukisan budi,
santun sukatan tinggi.....
Bahasa perhiasan diri.

Menilik kepada beberapa perkataan dalam rangkaian di atas ini, maka kan fahamlah kita betapa tingginya kedudukan "budi" dalam kehidupan kita sehari-hari. Kerana dengan adanya budi baik atau buruk itulah seseorang itu terpancang mulia atau hina dalam sesuatu masyarakat manusia. Pendeknya budilah pengukur darjah hidup seseorang manusia, budilah yang menentukan kedudukan seseorang; tiada syak lagi.

Kalau kita dapati seseorang itu terkenal dengan nama baik: umpama alim ulamak dalam bahagian keagamaan, terpuji dalam permainan, masyhur dan terkemuka dalam dunia pergerakan: maka tiadalah satu sebab yang boleh menjadikan demikian, melainkan kerana budi mereka dalam lapangan yang meninggikan kedudukan mereka itu juga.

Kalau kita semak semula hikayat-hikayat yang ditinggalkan oleh orang tua-tua maka kita akan dapati beberapa banyak tanda-tanda yang menunjukkan: bahwa budi itu berharga lebih mahal daripada matabenda yang disangka mahal. Umpamanya dalam rangkaian pantun:

Tidak usah berkain batik
Kalau tidak dengan raginya
Tidak guna berupa cantik
Kalau tidak dengan budinya.

atau dalam satu rangkaian lain yang mengatakan:

Pisang emas dibawa belayar
Masak sebiji di atas peti
Hutang emas boleh dibayar
Hutang budi dibawa mati.

Menilik kepada kata-kata ini, dapatlah dibandingkan bagaimana lebih tingginya budi itu dari harta dan rupa. Jadi ternyatalah yang kedudukan budi lebih tinggi daripada segala isi alam ini, iaitu bagi seseorang manusia yang tidak tertaaluk oleh nafsunya. Alangkah bahgiannya seseorang manusia yang mempunyai budi pekerti yang sempurna. Bukan saja dari kitab-kitab (hikayat-hikayat) tua yang kita dapati kata-kata yang menunjukkan ketinggian budi di sisi manusia. Tetapi dalam himpunan hadis-hadis Rasulullah yang diriwayatkan oleh Al-Bokhari dapat kita baca; Rasulullah ber-

sabda s.a.w telah bersabda kepada sahabat-sahabatnya, "Bahawa Allah, tidak memandang Ia akan rupa kamu dan harta kamu tetapi memandang Ia akan hati kamu dan amal-amal kamu." Di sini kita dapati lebih nyata lagi, bahwa hidup seseorang itu memang diperintah oleh Tuhan supaya berbudi: berbudi kepada diri sendiri, berbudi kepada Tuhan, berbudi kepada bumi Allah, berbudi kepada hamba Allah dan seterusnya. Dalam salah sebuah cerita rikaan pujangga juga mengatakan, "... kejahatan orang anakku jangan dibalas dengan jahat, sedaya upaya balaslah dengan baik. Tidak upaya membalas dengan baik, apa boleh buat! Tetapi jangan dibalas dengan jahat..."

Di sini pula kita diajar supaya jangan saja budi itu terkhas menjadi hak satu pihak; tetapi luaskanlah budi kamu hingga menjadi milik seterumu jua. Dengan demikian berbudi itu adalah sebahagian daripada iman!

Dalam peraturan hidup, kita tidak akan meningkat ke darjah yang tinggi atau berjaya kalau kita ^{berkelakuan} ~~berbudi~~ tidak baik. Kerana kelakuan buruk itu tidak sanggup melayakkan kedudukan seseorang itu dalam keadaan yang baik. Kalau kita berkehendak hidup dengan cara yang lebih baik, maka perbaikilah budi terlebih dulu: iaitu pimpinlah ruh sendiri dengan beriman kepada Allah, dan hiasilah dengan amal yang baik. Nescaya berbahagialah hidup kita di dunia dan akhirat

Seorang ahli filosofi pernah berkata, "Tiap-tiap yang terjadi kepada diri seseorang, juga akan terjadi kepada masyarakat." Demikianlah halnya budi. Ketinggian dan kepercayaan ramai terhadap sesuatu masyarakat semuanya memandang kepada budinya.

Pemutusnyalah marilah kita perbaiki gedung budi kita di mana yang agak binasa, dan marilah kita bina satu gedung budi yang bertapak kuat dalam dada tiap-tiap anak kita yang bakal menjadi anak negeri yang baik, yang sanggup menabur budi kepada agama, bangsa dan tanahairnya; supaya terbitlah suatu gedung kemakmuran hidup yang mengeluarkan madu bahgia untuk anak-anak kita di masa yang akan datang.